

MUNDO DI MUSICA

Skirbi pa Joy Kock

MUSICO POLITICO

Ignacio Paderewski tabata un famosísimo pianista y compositor Polaco. El a nace dia 6 di November 1860. El a duna hopi conciertonan grandi. Na edad joven el a recore cu exito Europa, Australia, y America. E tabata uno di e mejor interpretenan di Chopin. Su interes tabata grandi tambe pa politica. Na 1919 despues di a yuda cu un lucha tenaz pa libera su patria Polonia cu a bira independiente, el a wordo nombra Presidente di Consejo di Ministro y Ministro di Asuntonan Extranjero. Durante un cena pa jefenan di estado, Paderewski a bay saluda Clemenceau, Presidente di e Consejo di Ministro di Francia.

Ora Clemenceau a salude, el a bisa Paderewski, "Quelle degriengolade, mon cher maitre" (ki resbalon, mi querido maestro). Clemenceau a considera cu pa pasa di ser un gran musico pa un presidente di Consejo di Ministro tabata un demeritorio caida.

Na Aruba nos tin varios politico cu ta musico, otro pa puro hobby, otro un tempo como part-time. Nos no ta desea di comenta cu esaki ta un demeritorio caida y Clemenceau tambe nos lo a tume como un broma. Pero ser musico ta algo hopi honroso y un profesion cu ta tuma hopi años di profundo estudio.

Entre e musiconan politico ta figura entre otro Betico Croes, acordeonista, guitarista, dirigente di coro y cantante. Betico Croes tambe ta un preservador di nos dande. Frank Croes ta guitarista y cantante. Watty Vos tabata cantante, timbalero y back up coro den Los Duques na añanan 60. Maybeline Arends-Croes miembro di Staten, ta maestra di canto, piano, guitarra y cuatro. Michi Henriquez ta cantante y guitarista. Hendrik Croes ta guitarista y asina aki tin hopi mas cu ta politico-musico.

Un di e grandinan cu tabata politico-musico ta Padu del Caribe. Padu a yega di skirbi e poema/marcha cu tabata dedica na Jan Hendrik Albert Eman. E poema ta data for di 27 di Januari 1948 y nos a sake for di e buki Cosecha Arubiano. Cu permiso di Padu nos kier a publike awe cu Aruba ta na rand di su libertad.

SEPARACION

Drumi den mar Caribe
Aruba den su gloria,
cu placa y sin debe,
ta canta su victoria.
Den fondo di su alma
tin oro y rikeza,
su brisa nunca calma,
ta kita tur tristeza.

E solo di fortuna
a caba den pobreza,
e rayonan di luna,
ta sostene nobleza.
Industria Mericano,
trece aki pa Lago,
ta tene isla sano
y liber di estrago.

Cu suerte na nos banda
bao proteccion divino
directo bao Hulanda
tin bida den tur skina.
Aruba den su gloria,
tur liber dje madraza,
ta celebra victoria,
cu fe riba su braza.

Orgullo di nos terra,
t'e libertad preciosa.
k'e pone fin n'e guerra,
t'e igualdad dichoso.
Pa ordu di me Reina,
Separacion t'un echo,
den nomb'ri Wilhelmina
pa duna nos derecho.

CONCIERTO DI ALUMNONAN DI MAYBELINE ARENDS-CROES

Siman pasa nos tabata invita pa presencia un concierto di alumnonan di señora Maybeline Arends-Croes na Cas di Cultura especial pa mayornan di dicho alumnonan.

Nos a disfruta dos hora y mey di e musico cu locual e jovennan a siña durante di temponan corto, entre otro alumnonan cu seis luna, un año, y dos te tres año cu ta hayando les cerca Maybeline.

Tabata asombroso pa mira chikitinnan acompaña wals y tumba ariba cuatro cu hopi facilidad. Ariba guitarra tambe un cantidad grandidi juvennan a demostra e talento cu ta biba den Arubiano.

nan pa cu musica. Henter e atardi tabata reina un ambiente hogareño, manera ta cun familia grandi a bin hunto.

Dos ruman Solognier a trece numeronan un poco dificil manera The Entertainer, na oido di e presentenan.

The Young Voices cu ta rumbo pa profesionalismo a deleita e sala completo cu un variacion di walsnan Arubano.

Kevin, un alumno cu ta cerca Maybeline pa tres año, a toca Yesterday y Tinker Box cu hopi feeling y a ricibi hopi aplauso. Na final Maybeline a keda conmovi y a splica e mayornan con e jovennan aki ta cumenza

ta plink-plink cu un dede ariba piano y awe cu facilidad y sentimento ta toca numeronan un poco dificil y completo. Tambe den su discurso di ciere di e atardi, cu e alumnonan el a expresa e balor cu un desarojo musical tin pa un persona y kitando esnan cu ta birando teenager for di maldad y peligronan di awendia, entre otro droga, usando nan tempo liber pa studia musica.

Na final tur presente a lanta para y canta hunto cu tur e estudiantenan despedida di Padu del Caribe y tabata algo masha impresionante y inolvidable pa tur e presentenan.

Maybeline pabien na bo y tur bo alumnonan.

CONCIERTONAN DI VIVIONS EN CHANTANT TABATA EXITOSO

E conciertonan di Vivions en Chantant tabata exitoso tanto na John Wesley Auditorium como na Cas di Cultura. E promer parti di e concierto tabata consisti di cantonan clasico, semi-clasico y clasico popular.

Colaboradornan di e columna aki a comenta na nos cu e promer parti tabata falta algo di bida den e cantonan.

Despues di intermedio, Vivions en Chantant a trece cantonan mas popular y

aki e salanan di ambos concierto cu tabata bon bishita, a cumenza biba cu e coro.

Diferente numeronan immortal a wordo treci dilanti manera "quiereme mucho", Compadre Pedro Juan y un numero Surinameño, Cono oloisie lasie, cu un ritmo di calypso estilo Surinameño, a pone publico bati man pa timo di e cancion.

Na final di e concierto e publico cu tabata hopi

entusiasma a duna e coro bao di direccion di e maestro Rufo Odor un ovacion hopi grandi y e grupo espontaneamente a complace e publico.

Hopi Americano cu tabata presente a pidi pa haya disco o cassette di Vivions en Chantant, cu nan no tabata posee.

Ta intencion di e coro pa haci grabacion den futuro cercano. Nos pabien na Vivions en Chantant cu otro concierto exitoso.

CORONAN TA DESVANECIENDO

Conversando cu diferente dirigente di coronan nos a saca nos conclusion cu coronan ta cabando na Aruba. Vivions en Chantant ta e unico coro actualmente cu ta dunando conciertonan.

E coro di Efi Coutinho a stop di existi dia cu problemanan a surgi cu Efi na Arubaanse Muziekschool y el a bandona nos isla pa establece su mes na Estados Unidos.

Tabata tin persona cu a

confundi mi persona den e problema aki.

Sin embargo nunca mi tabata den directiva di Arubaanse Muziekschool ni ningun directiva cu tin algo di haci cu CCA.

Arubaans Gemengd Koor tampoco ta existi mas. Nos tabata tin un conversacion cu su ex-director Eddy Lieveldt. El a comenta cu pronto e lo cumenza cu un coro di homber y talvez algo otro tambe depende di e tempo

cu por reste.

Ruben Geerman tambe a comenta na nos cu probablemente e coro di Misa di Santa Cruz lo por bira un Stichting y cu posibilidad ta grandi cu nan lo por duna conciertonan publico.

Tur esaki ta plannan pa futuro, pero awor aki ta un coro so ta activo, fuera di coronan di diferente iglesianan, cu ta Vivions en Chantant. Nos ta

Sigui lesa pag. 10